

**Sinerissap qanittuani qaleralinniarnermi Upernaviup, Uummannap Qeqertarsuullu  
aqutsiveqarfiini aqutsiveqarfiit titartagaanerisa siunnersuutip tunngavilersuutaani  
allattorsimanerattuut kiisalu ilanngussani (bilag) 1-miit 4-mut titartarsimani  
malillugit allanngortinneqarnissaat isumageqqullugu Naalakkersuisut  
peqquneqarnissaannik**

**Inatsisartut aalajangiiffigisassaattut siunnersuut**  
*(Saqq.: Inatsisartunut ilaasortaq Karl-Kristian Kruse, Siumut)*

**pillugu**

**Aalisarnermut Piniarnermut Nunalerinermullu ataatsimiititaliap**

**ISUMALIUTISSIISSUTAA**

**Siunnersuutip aappaassaaneerneqarnerani saqqummiunneqartoq.**

Ataatsimiititaliami suliaqarnermi ilaasortat uku peqataapput:

Inatsisartunut ilaasortaq Nikolaj Jeremiassen, Siumut, siulittaasoq

Inatsisartunut ilaasortaq Karl-Kristian Kruse, Siumut, siul. tullia

Inatsisartunut ilaasortaq Saxtorph Didriksen, Siumut

Inatsisartunut ilaasortaq Knud Kristiansen, Atassut

Inatsisartunut ilaasortaq Aqqaluaq B. Egede, Inuit Ataqtigiiit

Inatsisartunut ilaasortaq Ane Hansen, Inuit Ataqtigiiit

Inatsisartunut ilaasortaq Hans Enoksen, Partii Naleraq

UPA 2014-imi ull. 13. maj 2014 siullermeerisoqareemat siunnersuut Ataatsimiititaliap misissorpaa.

**Siunnersuutip imaa aamma siunertaa**

Siunnersuutip siunertaraa sinerissap qanittuani qaleralinniarnermi Upernaviup, Uummannap Qeqertarsuullu aqutsiveqarfiini aqutsiveqarfiit titartagaanerisa siunnersuutip tunngavilersuutaani allattorsimanerattuut kiisalu ilanngussani (bilag) 1-miit 4-mut titartarsimani malillugit allanngortinneqarnissaat isumageqqullugu Naalakkersuisut peqquneqassasut.

**Siunnersuutip Inatsisartuni siullermeerneqarnera**

Amerlanerussuteqartut Siumut, Atassut, Partii Inuit aamma Partii Naleraq siunnersuummik tapersersuipput, Demokratilli itigartitsillutik.

Naalakkersuisut allannguutissatut siunnersuut una Inuit Ataqtigiinnit taperserpeqartoq saqqummiuppaat:

**Naalakkersuisut peqquneqarput sinerissap qanittuani qaleralinniarnermi Upernaviup, Uummannap Qeqertarsuullu aqutsiveqarfiini aqutsiveqarfiit susassaqtut peqatigalugit allanngortinneqarnissaat isumageqqullugu.**

**Isumasioqatigiinneq**

Siunnersuutip Ataatsimiititaliamit suliarineqarneranut atatillugu Ataatsimiititaliaq Aalisarnermut, Piniarnermut Nunalerinermullu Naalakkersuisumik isumasioqateqarsimavoq. Isumasioqatigiinnermut aggersaatip aamma Naalakkersuisup oqaasissaanut tunngavissiaq isumaliutissiissummut uunga **ilannugsaq 1**-tut tapiliunneqarput

**Ataatsimiititaliap siunnersuummik suliaqarnera**

Sinerissap qanittuani qaleralinniarnermi aqutsiveqarfiit killeqarfiisa allanngortinneqarnissaat, kiisalu aqutsinermi aalisarnerup sumiiffikkaartumik agguartaarneqarnerisa qanoq pitsaanerpaannngortinneqarsinnaanerannik misissuinissamut Naalakkersuisut piareersimanersut Inatsisartuni partiit siamasissumik amerlanerussuteqartut kissaatigigaat Ataatsimiititaliap maluginiarpa.

Sinerissap Qanittuani Aalisartut Piniartullu Kattuffiat (SQAPK) ulluni 2.-3. april 2014 aalisarneq pillugu isumasioqatigiittoqarnerani maanna aqutsiveqarfiit allanngortinnissaannut tigussaasumik siunnersuuteqarsimasoq Ataatsimiititaliap peqatigitillugu paasivaa.

Oqariartuutigineqartut Ataatsimiititaliap tusaatissatut tiguai, siunnersuummullu uunga paasisani saqqummiutissallugit:

- Ataatsimiititaliaq pingaarnertut **isumaqarpoq**, aalisarnermi sinaakkutissat atuisut suleqatigalugit aalajangersarneqartariaqartut, pineqartumilu aalajangersimasumi maleruagassanik aqutsinermi atuisut ilisimasaat misilittagaallu ataqtigiissillugu aqqissuussamik ilaatinneqartariaqartut. Tassunga atatillugu Ataatsimiititaliap oqaatigissavaa, siunnersuut una atuisut kattuffiinik oqaloqateqarneq tunngavigalugu saqqummiunneqartoq.
- Ataatsimiititaliaq **isumaqarpoq**, isumalluutininik uumassusilinnik atuinerup uumassuseqarnikkut isumannaatsumik ingerlanneqarnissaa isumannaarniarlugu

inatsisiliortut (Inatsisartut) aamma inatsisunik atortitsisut (Naalakkersuisut) inuiaqatigiinnut akisussaaffeqartut, taamaalillunilu isumalluutit piffissamut ungasinnerusumut piujuartinneqarsinnaanerat unammillissanngikkaat. Tassunga atatillugu Ataatsimiititaliap paasivaa, aqutsisoqarfiit killeqarfiisa allanngortinniarneqarnerannut siunnersuut uumassuseqarnikkut siunnersuisarnermut qanoq naleqqussarneqarsimanersoq siunnersuummi uani nassuiarneqarsimanngitsoq. Maluginiarluguli pinngortitap namminermini annertuumik imminut illersortuunera tunngavigalugu siunnersuutaasoq.

Northwest Atlantic Fisheries Organisation-imit (Atlantikap avannaata kippasissuani aalisarneq pillugu kattuffimmit / NAFO-mit) ukiunut marlunnut uumassuseqarnikkut siunnersuineq Ataatsimiititaliap matumani innersuussutigissavaa, Disko Bugtimi sinerissamut qanittumi aalisarneq ima sakkortutigigunartoq nalilerneqarmat, allaat aalisakkat pilerlaat (aalisakkat kinguaassiat) aatsaat takkuttut aalisarneqartarlutik. Ukiuni 2001-mit 2012-mut qalerallit agguaqatigiissillugu 10 cm-t missaanik milleriarsimapput, oqimaassutsimikkullu taamaaqataanik 2,5 kg-mit 1,4 kg-mut oqileriarsimallutik. Tamatuma malitsigisaanik pisarineqartartut taamaaginnartinniarlugit aalisartut aalisakkanik suli amerlanerusunik pisaqartariaqartassapput. Paasissutissat pissarsiarineqarsinnaasut ullumikkumut naleqqussarneranni uumassuseqarnikkut siunnersuinerit allanngortinnissaat pissutissaqartinneqarsimanngilaq, taamaattumillu Disko Bugtimi, Ummannap eqqaani Upernaviullu eqqaani 2014-imut pisassat 8.000, 6.000 aamma 6.300 tonsit ataaniitsinneqassasut ataatsimut isigalugu NAFO-mit kaammattuutigineqarluni.

- Ataatsimiititaliaq **isumaqarpoq**, sinerissap qanittuani qaleralinniarneq tunngaviusumik aaqqissuussaankullu unammilligassartaqartoq, taakkulu aaqqikkuminaatsuusut. Taamaalilluni umiatsiararsortut amerlassusiat pisassallu periarfissaasut imminnut oqimaaqatigiinnngillat, taamaalillunilu qalerallit pisarineqarsinnaasut amerlassusiannut saniliullugu pisaqarsinnaassuseq annertuallaartoq pilersimalluni. Tamanna tuniseriaatsip aalaakkaanngitsup pilersimaneranik kinguneqarpoq, tamatumanimi aalisartut piffissap sivikinnerpaap ingerlanerani aalisakkat amerlanerpaat pisarineqarnissaannut unammisarput. Taamaattumik pisassiissutitut aalajangersarneqartut akuttunngitsumik ukiup naannginerani nunguttarput. Taamaalilluni sinerissap qanittuani aalisarnermi umiatsiararsortut isertittagaannut atatillugu annertuumik nikingassuteqartoqartoq oqaatigineqartarpoq, aamma kinguaariit nikinnissaannut ajornartorsiuteqartoqartoq, piviusummi tunngavigalugit aalisarneq ingerlatsiniartunut nutaanut matoqqavoq.

Nunami tunitsivinnut tunisinerup aalaakkaanerunissaa isumannaarniarlugu, kiisalu pisassiissutitut aalajangikkat ukioq naallugu attanneqarsinnaanerat isumannaarniarlugu,

2014-imi januarimi qaammatikkaartumik pisassiissutit atulersinneqarput. Pisassiissutit aalisarnermik ingerlatalinnit assigiinngitsumik isummersorfigineqarput.

Aalajangiiffigisassatut siunnersuutikkut sinerissap qanittuani qaleralinniarnermi aaqqissuussaannikkut unammilligassat aaqqinniarneqartut Ataatsimiititaliap paasivaa. Tassa ima aalisarnerq sumiiffinnut annertunerusunut siaruaanniarneqarpoq, peqatigitillugulu maanna pisassiissutinit killiliinerit oqilisarniarneqartut. Taamaalilluni aalisartunut (inuusuttunut) inissaqartitsisoqarnerulissaaq, taamatuttaarlu aalisarnermi aningaasarsiornerup pitsaanerusup pilersinnissaanut periarfissiisoqassalluni.

Ataatsimiititaliap maluginiarpaa, Naalakkersuisut allannguutissatut siunnersuuteqartut, tamatumuunakkullu pissutsit qulaani taaneqartut arlallit ilanngunneqarsinnaanerit periarfissaasinnaasariaqartoq. Siunnersuutip kingunerissavaa, aqutsisoqarfinni killeqarfiit allanngortinnissaannut aalajangiinissap kingusinnerusumut kinguartinneqartariaqarnissaa, taamaattumillu Sinerissap qanittuani qaleralinniarneq pillugu Namminersorlutik Oqartussat nalunaarutaanni nr. 2-mi, 2. februar 2012-meersumi aalajangersakkat sulii atuuttariaqassallutik.

Ataatsimiititaliap isumaqarpoq, maanna aqutsiviit killeqarfiisa tuaviortumik aalajangerneqarneratigut paasissutissat amigaataaneranni ajoqutaasut kivinneqarsinnaanerannut ataatsimut isigalugu iluaqutissat pillugit naalakkersuinikkut aalajangiinissaq tunngavigineqartariaqartoq.

Tamatumanittaaq sinerissap qanittuani qaleralinniarnermi sinaakutissatut piunasaqaatit pitsaanerusut piaarnerpaamik pilersinneqartariaqartut Ataatsimiititaliap isumaqarpoq. Maanna pissutsit taamaalillutik attanneqarsinnaanngillat. Unammilligassat aaqqiivigineqarnissaannut Naalakkersuisut iliuuseqarfisimannngisaat sivisuumik atuussimapput. Tamanna pissutigalugu Naalakkersuisut piffissaqarnerujumallutik qinnuteqarnerat Ataatsimiititaliap akuersaarsinnaanngilaa. Taamaalilluni siunnersuut una Ataatsimiititaliap tapersorsorpaa.

### **Ataatsimiititaliap inassutai**

**Ataatsimiititaliami amerlanerussuteqartut** Siumumeersut, Atassummeersut aamma Partii Naleqqameersut aalajangiiffigisassatut siunnersuut aamma isumaliutissiissummi taaneqartutut allassimasut akuersaarpaat.

Tamanna tunngavigalugu Ataatsimiititaliami amerlanerussuteqartut qulaani taaneqartut **UPA 2014/106 akuerineqassasoq inassutigaaat.**

**Ataatsimiititaliami ikinnerussuteqartut** Inuit Ataqtigiinnit inuttaqartut siunnersuut pillugu ima oqaaseqassapput:

Sinerissap qanittuani qaleralinniarnermi pitsaanerpaamik sinaakktissiorsinnaaneq Inuit Ataqtigiit kissaatigaat. Taamaattumik sinerissap qanittuani aqutsisoqarfiit allanngortinneqarsinnaanersut Inuit Ataqtigiit misissorniarlugit sivilisuumik isiginiagaqarsimapput, taamaalillutik aqutsisoqarfiit killeqarfii aalisarnerup allanngorneranut naleqqussarneqarsinnaassammata. Tassunga atatillugu Pinngortitaleriffimmit oqaatigineqartut Inuit Ataqtigiit ilaatigut innersuussutigissavai, tassanga oqaatigineqarmat silap allanngortornerata malitsigisaanik taamaalillunilu immap kissatsikkiartornerani nillertumi aalisakkat avannarparteriartuaartut.


Taamaattorli atuisut akuuteqqaartinnagit aqutsisoqarfiit killeqarfiisa allanngortinneqarnissaat Inuit Ataqtigiit ilalersinnaangilaat. Taamaalillutik Inuit Ataqtigiit isumaqarput, sinerissap qanittuani qaleralinniarnermi sumiiffikkaartumik agguataarinermik allannguinerit aalisarnermut sunnuteqartorujussuusinnaasut, taamaattumillu atuisut ilisimasaasa misilittagaasalu ilaatinneqarnissaat pingaaruteqartuusooq.


Peqatigitillugu Inuit Ataqtigiit piujuartitsineq tunngavigalugu aalisarnermik naalackersuinikkut tunngaviusumik ingerlatsinertik naqqissusissavaat, taamaalillutik kinguaariit tullinnguuttut aalisakkanik isumalluutunik aamma atuisinnaaniassammata. Tamanna tunngavigalugu aqutsisoqarfiit killeqarfiisa allanngortinnginneranni kattuffiit attuumassutillit aamma Pinngortitaleriffiup tusarniarneqarnissaat pingaaruteqarlunnartuusooq Inuit Ataqtigiit aamma isumaqarput.


Taakku oqaaseqaatit tunngavigalugit Naalackersuisunit allannguutissatut siunnersuut Inuit Ataqtigiit ilalerpaat.


Ataatsimiititaliami ikinnerussuteqartut qulaani taaneqartut tamanna tunngavigalugu **Naalackersuisunit allannguutissatut siunnersuut akuerineqassasoq inassutigaat.**


Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.


  
Nikolaj Jeremiassen,  
Siulittaasoq


  
Karl-Kristian Kruse,  
Siulittaasup tullia

  
Saxtorph Didriksen

  
Knud Kristiansen

  
Aqqaluaq B. Egede

  
Ane Hansen

  
Hans Enoksen



# BILAG 1

## **Aalisarnermut, Piniarnermut Nunalerinermullu Naalakkersuisoq /MAANI**

Ulloq: 28. maj 2014  
J.nr.: 01.36.01.03-00054

### **Aalisarnermut, Piniarnermut Nunalerinermullu Ataatsimiititaliamit pingasunngornermi ull. 28. maj 2014, nal. 19.00 – 20.00 ataatsimiittarfik 2-mi apersorneqarnissamut aggeqqusissut.**

Ataatsimiititaliap aalajangiiffigisassatut siunnersuummik UPA 2014/106-imik suliarinninneranut atatillugu Naalakkersuisoq Finn Karlsen Aalisarnermut, Piniarnermut Nunalerinermullu Ataatsimiititaliamit matumuuna aggersarneqarpoq.

Apersuinermi makku oqaluuserineqarnissaat ataatsimiititaliamit kissaatigineqarpoq:

#### **Sinerissamut qanittumi qalerallinniarnermi aqutsiveqarfiit allangortinneqarnissaat pillugu.**

Sinerissamut qanittumi qalerallinniarnerup sumiiffinnut agguataarneqarnerata sapinngisamik pitsaanerpaamik ingerlanneqarnissaanut periarfissat paasineqarnissaat siunertaralugu Naalakkersuisut misissuinermik aallartitsisimasut ataatsimiititaliap paasivaa.

#### **Apeqqu 1**

Suliap maanna killiffia – tassunga aamma ilanngullugu misissuinerup qaqugu naammassineqarnissaa naatsorsuutigineqarnersoq – nassuiaatigeqqullugit Naalakkersuisut qinnuigineqarput.

#### **Apeqqu 2**

Ilimagisat anguniakkallu misissuinermut tunngaviusut – tassunga ilanngullugu misissuineq aalajangiiffigisassatut siunnersuut UPA 2014/106 imaluunniit ull. 2.-3. april 2014-imi aalisarnerq pillugu isumasioqatigiinnermi SQAPK-p saqqummiussaa aallaavigalugu misissuineq ingerlanneqarnersoq – Naalakkersuisunit nassuiaatigeqquneqarput.

#### **Apeqqu 3**

Misissuinermut siuliani taaneqartumut atatillugu tusarniaanermut akissutit Naalakkersuisunit tiguneqartut ilisimatitsissutigeqqullugit – aammalu ataatsimiititaliamut ingerlateqqeqqullugit – Naalakkersuisut qinnuigineqarput.

#### **Apeqqu 4**

Aalajangiiffigisassatut siunnersuummut UPA 2014/106-imut atatillugu naalakkersuinikkut inisisimanertik nassuiaatigeqqullugu Naalakkersuisut qinnuigineqarput. Taamaalillunilu ataatsimiititaliaq isumaqarpoq Aalisarnermut, Piniarnermut Nunalerinermullu Naalakkersuisup oqaaseqaatit tusagassioffinnut

oqaatigisai Naalakkersuisup Inatsisartut ataatsimiittarfianni oqaatigisaanut naapertuutinngitsut.

Naalakkersuisumik apersuinermini ataatsimiititaliap allanik aamma apeqquteqarnissani naatsorsuutigaa.

-----

Ataatsimiititaliap Naalakkersuisumik apersuinerata Naalakkersuisunut ilaasortap ataatsimiititaliallu akornanni pingaarnersiulluni tulleriarinerit anguniakkallu pillugit naalakkersuinermut tunngasumik oqaloqatigiinnertut sapinngisamik iluseqartinneqartarnissa Ataatsimiititaliamit anguniarneqarpoq. Taamatut oqallinneq ammasumik oqallinnertut sapinngisamik ingerlanneqassaaq.

Kiisalu apeqqutit siuliani allassimasut pillugit allakkiamik kalaallisut danskisullu ataatsimiititaliap Naalakkersuisumik apersuineranut atatillugu pissarsisinneqarnissani ataatsimiititaliap kissaatigaa. Allakkiap kingusinnerpaamik ataatsimiititaliap Naalakkersuisumik apersuinerata kinguninngua uunga nassiunneqarnissaa qinnutigineqarpoq: [gimsing@inatsisartut.gl](mailto:gimsing@inatsisartut.gl). Allakkiaq ataatsimiititaliap Naalakkersuisumik apersuinissaanut nassarneqarpat atorneqarpallu taassuma nuutinnera ataatsimiititaliap Naalakkersuisumik apersuinerata aallartinnerani ataatsimiititaliap oqalutnaanun tunniuteqquneqarpoq.

**Inussiarnersumik inuulluaqqusillunga**



Nikolaj Jeremiassen

Ataatsimiititaliap siulittaasua





Inatsisartut Aalisarnermut, Piniarnermut Nunalerinermullu Ataatsimiititaliaat  
Inatsisartut Allattoqarfiat  
Postboks 1060  
3900 Nuuk

### **28. maj 2014-imi apersorneqarnissamut aggeqqusissut pillugu**

Ataatsimiititaliap apersorneqarnissamut qaaqqusissutaa 28. maj 2014-imeersoq innersuussutigalugu, matumuuna ataatsimiititaliap apeqqutigisai akissuteqarfigissavakka:

#### **Apeqqu 1**

*Suliap maanna killiffia – tassunga aamma ilanngullugu misissuinerup qaqugu naammassineqarnissaa naatsorsuutigineqarnersoq – nassuiaatigeqqullugit Naalakkersuisut qinnuigineqarput.*

Inatsisartut ataatsimiittarfiani siusinnerusukkut oqaatigisattut aalajangiiffigisassat taamatut isikkullit aalajangiiffiginnginnerini siunnersuutip kingunissai eqqarsaatigilluaqqaartariaqarput. Tassunga tunngatillugu oqaatigaarattaq siunnersuutip nakkutilliinermut aammalu biologit siunnersuinerannut tunngasut kingunissaat immikkut isiginiarneqartariaqarput. Tassunga tunngatillugu ilisimatitsissutigisinnaavara nakkutilliinerit pisassiisutissallu ilusissaat assigiinngitsut atorfilinnit misissoqqissaarneqaleruttormata, aqutsiveqarfinni killeqarfiit allangortinneqassagalarpata atorneqarneqarsinnaasussat.

Naatsorsuutigineqarpoq suliaq pineqartoq qaammatit marluk ingerlanerani naammassineqarsinnaasasoq.

#### **Apeqqu 2**

*Ilimagisat anguniakkallu misissuinermut tunngaviusut – tassunga ilanngullugu misissuineq aalajangiiffigisassatut siunnersuut UPA 2014/106 imaluunniit ull. 2.-3. april 2014-imi aalisarneq pillugu isumasioqatigiinnermi SQAPK-p saqqummiussaa aallaavigalugu misissuineq ingerlanneqarnersoq – Naalakkersuisunit nassuiaatigeqquneqarput.*

Aqutsiveqarfinni killeqarfiit allangortinneqarsinnaanerintut periarfissat misissorneqarnissaanik suliaq Aalisarnermut Naalakkersuisunngorama aallartisippara. Aalisarneq pillugu isumasioqatigiinnermi assigiinngitsunik siunnersuuteqartoqarpoq, taakkulu misissuinerintut ilanngullugit suliarneqalerput. SQAPK-ip ilanngussai susassaqtartut ilanngussaattut isigineqarput susassaqtartummi allat soorlu Pinngortitaleriffik, KANUAANA kiisalu KNAPK suliap ingerlateqqinnerani akuutinneqartussaassammata. Aalajangiiffigisassatut siunnersuut UKA2014/106 misissuinerintut ilanngunneqassaartaaq.

Tassunga tunngatillugu anguniagaraara aqutsiveqarfiit isorartuut, naammattumillu siunnersuuffigineqarsimangitsut, annikillisinneqassasut. Taamatutttaaq anguniagaraara aqutsiveqarfiit assigiinngitsumik aalisarfiusartut naleqqussarneqarnissaat soorlu Nuus-

28. maj 2014  
Sagsnr. 2014-100370  
Dok. Nr. 1591734

Postboks 269  
3900 Nuuk  
Tlf. (+299) 34 50 00  
Fax (+299) 34 63 55  
E-mail: apnn@nanoq.gl  
www.naalakkersuisut.gl

suaq aamma Kullorsuaq, aqutsiveqarfimmi tassani piffinnut allanut sanilliullugit ukiuuneraniinnerusoq aalisarfiusartuni.

### **Apeqqu 3**

*Misissuinnermut siuliani taaneqartumut atatillugu tusarniaanermut akissutif Naalakkersuisunit tiguneqartut ilisimatitsissutigeqqullugit – aammalu ataatsimiititaliamut ingerlateqqeqqullugit – Naalakkersuisut qinnuigineqarput.*

Oqaatigineqareersutut suliaq ingerlavoq aqutsiveqarfinnilu killeqarfiit allanngortinneqar-nissaanut siunnersuut tusarniutigineqassaaq aqutsiveqarfinni allanngortitsinikkut nakkutilliinikkut pisassiisarnerrillu kingunissat ilisimaneqaleriapata. Suliap ingerlanneqarnera pillugu Ataatsimiititaliaq ingerlaavartumik ilisimatinneqartassaaq.

### **Apeqqu 4**

*Aalajangiiffigisassatut siunnersuummut UPA 2014/106-imut atatillugu naalakkersuinikkut inisisimanertik nassuiaatigeqqullugu Naalakkersuisut qinnuigineqarput. Taamaalillunilu ataatsimiititaliaq isumaqarpoq Aalisarnermut, Piniarnermut Nunalerinermullu Naalakkersuisup oqaaseqaatit tusagassiorfinnut oqaatigisai Naalakkersuisup Inatsisartut ataatsimiittarfianni oqaatigisaanut naapertuutinngitsut.*

Oqaatigisimasama naapertuutinnginneranik oqariartuut isumaqatiginnginnakku, kissaa-tigissavara apeqqu tip itisilerneqarnissaa.

Inussiarnersumik inuullaqqusillunga

  
Finn Karlsen